

讚禮地藏菩薩懺願儀

明菩薩沙彌古吳智旭述

行者淨身口意。至尊像前。應念我及眾生。積迷造罪。無救無歸。大士洪慈。為歸為救。又念大士法身。及十方三寶。體常遍滿。無所不在。與我現前心性。平等無二。起深信解。如奉慈顏。敷具拱立。唱云。

一切恭敬。

一心頂禮。十方常住三寶。

總一禮已。是諸眾等。各各胡跪。嚴持香華。如法供養。唱云。

願此香華雲。遍滿十方界。供養一切佛尊法諸賢聖。
無邊佛土中。受用作佛事。

至此停唱。燒香。散華。至心想云。一切佛法僧寶。體常遍滿。無所不在。願今以此香華。等同法性。普薰一切諸佛刹土。施作佛事。十方一切供具。無時不有。我今當以十方所有。一切種種香華瓔珞幢幡寶蓋。諸妙珍飾。種種音樂。燈明燭火。飲食衣服。臥具湯藥。乃至盡十方所有。一切種種莊嚴供養之具。憶想遙擬。普共眾生。奉獻供養。一切世界中。有修供養者。我今隨喜。若未修供養者。願得開導。令修供養。又願我身。速能遍至一切刹土。於一一佛法僧所各以一切種種莊嚴供養之具。共一切眾生等持奉獻。供養一切諸佛法身色身舍利形像。浮圖廟塔一切佛事。供養一切所有法藏。及說法處。供養一切賢聖僧眾。願共一切眾生。修行如是供養已。漸得成就六波羅蜜。四無量心。深知一切法。本來寂靜。無生無滅。一味平等。離念清淨。畢竟圓滿。想已起云。

供養已。一切恭敬。

一禮已。次復合掌。讚云。